

A cummissione  
«Education, Formation, Jeunesse et  
Sport et Lingua corsa»  
di u CESC  
à l'Università u 26 d'ottobre

# Lingua corsa

## I Ragguagli di l'Università

N° 10  
Novembre 2005

U 26 d'ottobre 2005 hè statu un ghjornu impurtante per a cumunità universitaria. Per a prima volta a cummissione «Education, Formation, Jeunesse et Sport et Lingua corsa» di u Cunsigliu Economicu, Sociale è Culturale di a CTC hè stata accolta da l'Università, à u Palazzu Naziunale, per dibatte d'un tema chì tocca da veru a sucietà corsa, è particularmente a ghjuventù, quellu di a lingua corsa.

L'Università, chì hà veramente a voglia di vede pruposte concrete fatte nantu à issu tema di a lingua, avia appruntatu una cuntribuzione sintetica chì avia per scopu di dà assi di riflessione nantu à a pulitica linguistica da mette in ballu in Corsica. Stu travagliu hè statu fattu à partesi da parecchi cuntribuzione scritte chì l'Università avia dumandatu à sfarente attore di a sucietà (medici, ghjurnalisti, attori, prufessori di corsi...). Sta pusizione hè stata difesa da Pierre-Mathieu Nicolai, incaricatu di missione in lingua è cultura corsa à l'Università.

Parechji invitati, cum'è Michel Beveraggi per UNIGROS, Sébastien Quenot è Mattea Lacave per l'associu « À Scioglilingua » è Pascal Ottavi per l'IUFM, anu dattu u so parè nantu à a piazza di a lingua corsa in a sucietà.

Dopu à ste cuntribuzione ci hè statu un dibattitu passianatu è passianante cù i membri di a cummissione.

Tuttu a ghjente hè stata d'accunsentu per di ch'è lu ci vulia à sorte da a pulemica, chì troppu à spessu tucava i dibattiti nantu à a lingua, per fà pruposte serie è concrete chì permetterianu di sbuccà nantu à una sucietà bislingua.

Di sicuru s'hè parlatu assai di u rollu di a scola, ma i partecipanti anu vulsutu andà al dilà per vede cosa si pudia fà à l'infora.



*Pierre-Mathieu Nicolai*

Da a famiglia insin'à l'istituzione passendu per l'associi, i media o u mondu di u travagliu tutti i mezi sò stati studiati per rende à a nostra lingua a piazza chì deve esse a soia in a sucietà.

À partesi da a so spirienze (teatru, capi imprese, sindacalisti, ripresentanti istituzionali...), ognunu hà pruvatu à mostrà chì a lingua corsa, in più d'esse una ricchezza culturale impurtantissima, pudia esse un elementu di cusionu sociale è ancu di sviluppu economicu.

In fine, i partecipanti à l'adunita, invitati cum'è membri di a cummissione, sò cascati d'accunsentu nantu à u bisognu di mette prestu prestu in ballu una vera pulitica linguistica per permette à tuttu u mondu d'ammaistrà a lingua corsa è per dà li un veru statutu in a sucietà, ch'ellu sia à u livellu economicu, sociale, culturale o istituzionale.

Sta riunione hà da sbuccà nantu à un travagliu di sintesi chì permetterà di mostrà ciò ch'è lu si pò fà à cortu, mezu è longu andà. Dopu, toccherà à a cummissione di pone stu travagliu à u CESC chì ferà, ellu stessu, pruposte à l'Assemblea di Corsica per mette in opera una vera pulitica linguistica.

